

Эн улсиг олдж болхий?

Мана советск олт-келн амтн Тöрскн орн-нутган харсдж фашистнрлэ ноолддж бääх цагт, тер олт харсачнрин денъгд Ломакин П. А. гидг кун командиртэ нег бичкн партизанск отряд кучтэ кевар фашистнрлэ ноолддж йовдж.

Тер отрядт дөрвн хальмг кун йовсн бääдж: Манджиева С. Д., Алыков Д. Г., Занарп А. В., дөрвдгч күүкнэ нернь олддж өгхш.

1942 джил, Ростовск областин Заветинск района Киселевка гидг селанэ өөр, нег сө тер бичкн партизанск отрядиг румынск фашистнр—800 кун бүслэд авч.

Өрүн гегэн газрт унхин алднд тов, миномет хамгар хаджагъад, фашистнр дэврэд ордг болна. Партизанск отрядт автомат, гранат хойрас онъдан зер-зев уга бääдж. Болв, зөрмг советск партизанр сүрдл уга, бийэсн ик олт, дала элдв зертэ-зевтэ дääснлэ аврлт уга бääр бэрлдж. Фашистнр атак орад ирхлэ, манахс мел өргн доран ирүлчкэд автоматсин сумар хадад хаяд бääдж. Аш-сүүлднэ сумнэ чигн, гранатнэ чигн чилэд ирхлэ, мана баатр партизанр хортнд келбэргддж нерэн гутахин ормд сүл сумарн бийэн хагъад үкэд бääцхадж. Тиигэд ирсн цагт, отрадин командир Ломакин нег хальмг партизанк күүкнд отрадиннэ улан туг өгэд:

„Ягъад болв чигн партизанск отрядсин штабд күүргдж өг!“ —гидж закдж.

Тер аргъта партизанк күүкн төгэлнъдэн шатдж бääсн дääнэ түүмрэс алдрдж гарад, сала болгънар бүгэд, селэдин захар, гермүдин чердак деер, өвснэ хаша болгънар бултад, штабдан күүрч йовтлнэ, тер партизанк күүкиг немш фашистнр кел бэрдж авч.

Баатр партизанк күүкн немш фашистнрт нег-чигн үг эс келдж өгхлэнэ, күүнэ газр эзлхэр ирсн, кумни дүрэн геесн тер немш-чонмуд партизанк күүкиг дүүджлэд алдж оркдж.

Тер күүкнэ нерн-уснэ, кенэ кен гидг күүкн бääснэ ода чигн манд олдад уга.

Эврэннэ ээдж болсн Төрскн орн нутган харсдж йовад, галгääзнэ насан олт мана төлэ өгсн эн улсин нериг онъдин зүүркидэн хадгълдж йовх зөвтэ бидн. Түүни эркд, эн дөрвн хальмг партизанриг таньдг улс бääхлэ, теднэ гарсн газринэ, насинэ, нер-усинэ, өөрхн иньгамргинэ болн элг-садинэ манд бичдж илгэтн гидж олт умшачнр, танас эрдж бääнэв.

Бичгэн иим хайгар илгэтн: Элст балгъсн, „Хальмг үнн“ — газетин редакт.

КАЛЯЕВ САНДЖИ.